

# Efesios

## *Jacheuayama*

<sup>1</sup> Atše Pablo, Jesucristbe ichmoná Bëngbe Bëtsá chca yobóseyeca, quem tsbuanácha sentsabiamná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiama.

<sup>2</sup> Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnana, y chata chaboma tšëngaftangbe ainaniñe tšabe ebionana chašmotsebomnana.

*Crísoftaca cányiñe mo canyáca jtsemnëse, bënga mochántsebomna nyetsca tšabe soyënga, ntšamo celoca yobinyncá*

<sup>3</sup> Bëngbe Bëtsá y Bëngbe Utabná Jesucristbe Taitábioye mochjëtschuaye, er bënga Crísoftaca cányiñe mo canyáca mondménayeca, Bëngbe Bëtsá tojama bënga nyetsca tšabe soyënga chamotsebomnana, ntšamo celoca yobinyncá.

<sup>4</sup> Bëngbe Bëtsá bënga šojanabacacá Crísoftaca cányiñe mo canyáca chamotsemnana, cabá quem luare cha ndama orscana, bënga chabe delante chamotsemnana chabe entšanga, bacna soyëngama perdonánënga y chabe oservénënga, y bënga ainaniñe bacna soye ndbomnënga imomna ca cha cháuyanama.

<sup>5</sup> Bëngbe Bëtsá šuababuányëshanayeca, tempo cha tojanjuabó y tojánbošena bënga mo cachabe

basengcá jábiamama, chë Jesucristo yochjanma sóyeca.

<sup>6</sup> Chíyeca bēnga Bēngbe Bētsábioye sempre jtsatschuanayana, cha bēngbe tšabiamá juabna yobómnayeca, ndayá chabe Bonshana Uaquiñáftaca bēngbe tšabiamá cha tojamama.

<sup>7</sup> Bēngbe Bētsá puerte bonshanánaca bēngbe tšabiamá bētscá yojuabnáyeca, cha bēngbe bacna soyēngama šojtsaperdoná y šojatsebacá, er Jesús bēngbiamá tojanóbana, chabe buiñe juabuáshanēse.

<sup>8</sup> Bēngbe Bētsá tojama bēnga nýets osertánana y becá juabna chamotsebomnama, cha becá bonshánánaca bēngbe tšabiamá juabna yobómnayeca,

<sup>9</sup> y tojama bēnga chamotsetatšēmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanyé. Ndayá jamama Bēngbe Bētsá tempo yojanjuabnacá, ndayá cha tojama bēnga chamotsetatšēmbuama, cachá yojanjuabná chca jamama.

<sup>10</sup> Ndayá jamama Bēngbe Bētsá yojuabnacá, lempe echanjochnēngo nýa chama tempo chaojóshjango ora, y quem Bēngbe Bētsabe juabna endmēna jamana, lempe ntšamo cha tojamcá celoca y quem luarentše, Cristo chamotsebomna nýetsca chë soyēnguiñe mo chë mandayacá.

<sup>11</sup> Bēngbe Bētsá sempre jamana nýetsca soyēnga ntšamo tojtsejuabnacá y tojtsebošcá. Y Bēngbe Bētsá bēnga šojabacacá, ntšamo cabá chca ndama ora yojanjuabnacá; chca, bēnga Crísoftaca cánýiñe mo canýacá jtsemnēse, bēnga chamóyēngacñama ndayá Bēngbe Bētsá chabe entšanga jatšatayama

tojašebuachená, mo chëngbe otocana soycá.

<sup>12</sup> Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tšabe soyënga jtsamëse chamotsiyenama, chca, chë inye entšanga Bëngbe Bëtsabe obenanama cha chamotsatschuanama.

<sup>13</sup> Y tšëngaftágnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá tojanma tšëngaftanga Crísoftaca cánýiñe mo canýacá chašmotsemnama y tcmojanainýnaná tšëngaftanga chabe entšanga bétsemnama. Bëngbe Bëtsá chca tojanma, Uámana Espíritu tšëngaftangbe ainaniñe cháúamashënguama tojanma ora, ntšamo tempo cha tojanašebuachenacá.

<sup>14</sup> Bënga chë Uámana Espíritu bëngbe ainaniñe mondbómnyeyeca, corente mondétatšëmbo ndayá Bëngbe Bëtsá chabe entšanga tojašebuachenacá bënga mochjójyëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bëngbiama inétsamama, nyetscanga cha mochántatschuanaye, cha bëtsá y obená bétsemnama.

*Pablo Bëngbe Bëtsábioye tbojanimpadá, ošbuáchiyënga osertánana chamotsebomnama.*

<sup>15-16</sup> Chcáyeca, atšna, Bëngbe Bëtsá tšëngaftangbiama stseimpadana ora, sempre

cha sēndbētsatschuanaye, er atše sēnjátatšēmbona ntšamo tšēngaftanga Bēngbe Utabná Jesúsbeñe tša šmojtsošbuáchema, y ntšamo tšēngaftanga n̄yetsca chē Bēngbe Bētsábenga imomnēnga šmababuán̄yeshanama.

<sup>17</sup> Bēngbe Bētsá, Bēngbe Utabná Jesucristbe Taitá, nda corente iuámana, sēntseimpadana cha chaoma Uámana Espíritu chacmējabuachama, corente osertánēnga chašmotsemnana, y chacmin̄yan̄yé nda Bēngbe Bētsá yomnana, chca, más tšabá cha chašmotsábuatmama.

<sup>18</sup> Atše, Bēngbe Bētsá sēntseimpadana, cha chaoma tšēngaftanga Bēngbe Bētsabe soyēnguiñe corente osertánana chašmotsebojnana, tšēngaftanga chašmotsetatšēmbuama, ndayá Bēngbe Bētsábeñe jtsošbuáchiyēse tšēngaftanga šmojtsošbatmancá cha cmochjátšatayama. Bēngbe Bētsá tcmojáchembo chábeñe chca chašmotsobátmanama. Atše cha sēntseimpadana, chaoma tšēngaftángnaca chašmotsetátšēmbo tša bēts cá y bēts soyēnga yomna ndayá chabe entšanga cha tojašebuachenacá;

<sup>19</sup> y chašmotsetátšēmbo tša bēts soye y ndocna te ntjēftsopochócama chabe obenana yomnana, chē ndayá bēngbe ainaniñe tšabe soyēnga yojtsama, bēnga chē Crístbeñe ošbuachiyēngbeñe. Cach quem puerte bēts obenana endmēna,

<sup>20</sup> ndáyeca Bēngbe Bētsá tojanma Cristo cháuatayenama, y chabe catšbioica celoca tbojtantbema chaotsemándama.

<sup>21</sup> Choca Cristo n̄yetsca soyēnguiñe yojtsemánda, y más bēts cá obenana y mando yojtsebojnana n̄yetsca mándayēngbiana, chē mando y obenana

bomnëngbiama, y cha yomna más uamaná y bētsá n̄yetsca chē entsangbiama mo bētsētsangcá utabnëngbiama, chëngbe uabaina respétoca jtsichámēse. Cristo puerte bētsá endmēna lempe ntšamo quem luarentše yobín̄yname y Cristo yochjēsabentšana yochtsebin̄yánmānaca.

<sup>22</sup> Bëngbe Bētsá tojama Cristo n̄yetsca soyënguiñe chaotsemándama, y tbojanábuayana n̄yetsca soyënguiñe chaotsemándama, chábeñe ošbuáchiyëngbe tšabiama.

<sup>23</sup> Cha endmēna n̄yetsca chábeñe ošbuáchiyëngbe mandayá, y chënga mondmēna mo cachabe cuerpo cuaftsemncá. Chëngbe ainaniñe cha endoyena y n̄yetsca luarënguín̄naca, y lempe cha endēmánda.

## 2

*Atsebácanënga mondmēna, Bëngbe Bētsá šuababuán̄yeshanayeca*

<sup>1</sup> Tempo tšëngaftanga Bëngbe Bētsabiama mo obanëngcá šmonjamna, er tšëngaftanga šmonjaniyena, ntšamo Bëngbe Bētsá yomandacá ntsamcá, y bētscá bacna soyënga šmojánama.

<sup>2</sup> Chca, tšëngaftanga šmonjánama mo chē n̄ye quem luarama enójuabnayënga monduamancá, y šmonjanēyeunana Satanás, chē bacna espíritënga obenana bomnënga y quem luarentša tsbanánoca imomnëngbe amëndayá, chē Bëngbe Bētsábioye ndēyeunanëngbe ainaniñe yománda espíritu.

<sup>3</sup> Tempo bënga n̄yetscanga fsënjaniyena ntšamo tšëngaftanga šmonjaniyencá. Bënga soyënga fsënjánama, n̄ye ntšamo ftsjanbošcá n̄ye bëngbe

cuerpëngbe tšabiamá, y nÿe ntšamo bëngbe juabna enjamncá bacna soyënga jamama. Bënga fsënjanियena soyënga jtsamëse mo chë Bëngbe Bëtsábioye nduabuatma entsanga mondbetsamcá; chë causa bënga fsënjanomerecena jtsebomnana chë Bëngbe Bëtsabe uabouana castigo, cachcá chë Bëngbe Bëtsábioye nduabuatmëngcá.

<sup>4</sup> Pero Bëngbe Bëtsá sempre tša lastemado entsangbiamá endmëna y siempre corente bënga šondábabuanÿeshana;

<sup>5</sup> y chíyeca, bënga cabá mo obanëngcá chabiamá fsënjamna ora, bacna soyënga fsënjánama causa, chora cha tojanma bënga tšabe vida chamotsebomnama y Crísoftaca cánÿiñe mo canÿacá chamotsemnama. Bëngbe Bëtsá tšëngaftangbe tšabiamá juabna bómnyeca, bacna soyënguentšana tcmojatsebacá.

<sup>6</sup> Bënga Jesucrísoftaca cánÿiñe mo canÿacá bëtsemnyeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuafjamcá y Cristo Jesúseftaca celoca cuaftatbiamcá.

<sup>7</sup> Chca enjamna, Bëngbe Bëtsá entsanga cháuinÿanÿema nÿetsca joshjanguama tempënguiñe, ntšamo cha bëngbe tšabiamá bëtscá juabna bëtsebomnama, cha Cristo Jesúseftaca bëngbioye tšabe juábnaca šojánanÿe ora.

<sup>8</sup> Er Bëngbe Bëtsá tšëngaftangbiamá tšabe juabna yojánbomnyeca, tcmojatsebacá, Jesucristbeñe šmojtsanošbuáchema; pero atsebácanënga šmondmëna, ndoñe cach tšëngaftanga ndayá šmojánmayeca, ndayá atsbocaná jtsemnana

endmëna Bëngbe Bëtsabe canÿe tšetana soye.

<sup>9</sup> Atsebácanënga šmondmëna, ndoñe cach tšëngaftanga ndayá šmojánmayeca; chíyeca ndocná quenátobena jtsenábotamnayana atsbocaná yojtsemnama.

<sup>10</sup> Bëngbe Bëtsá šojtabiama ntšamo bënga mondmëncá, y Cristo Jesúseftaca cánÿiñe mo canÿacá bëtsemnayeca, Bëngbe Bëtsá mo tsmëma entšangcá cuaftsatsmëncá šojtabiama, tšabe soyënga jtsamëse jtsiyenama. Y ndayá bënga tšabá mondamcá, Bëngbe Bëtsá tempo tojanprontá bënga chamotsamama.

*Crístbeyeca tempcá tšabá Bëngbe Bëtsáftaca jtsatsmënana*

<sup>11</sup> Tšëngaftanga ndoñe judiënga, ndëmuanÿenga judiënga cmondubuatma “chë más delicadentše base bobachtema ndëtëtšenënga ca”, chëngcá uinÿnanánënga ndoñe šmondmënama; chënga cachënga jtsenábobuatmana “chë más delicadentše base bobachtema tëtšenënga ca”, y cachëngbe cuerpënguiñe chca jtsamana. Mëntšá, tšëngaftanga chë ndoñe judiënga,

<sup>12</sup> šmochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tšëngaftanga Cristo ndoñe šmonjánbomna, Israeloca entšangbiana stëtsoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entšanga tojanašebuachenacá. Tšëngaftanga quem luarentše šmonjaniyena ndocnábeñe ntsobatmancá y Bëngbe Bëtsá ntsabuatmcá.

13 Pero mora tšëngaftanga Cristo Jesúseftaca cánÿiñe mo canÿacá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye chašmotsábuatmama; y chca yomna, er Jesús, chabe buiñe juabuáshanëse, tšëngaftangbiamama tojanóbana.

14 Cach Cristo yojsama bënga tempcá tšabá Bëngbe Bëtsáftaca chamotsemnama. Cha tojama judiënga y ndoñe judiënga nÿetscanga mo cachca entšangcá chamotsemnama, mo nda canÿe tapiëse tojtsendbemcá, chë ndayëšeca canÿe luarentša entšanga tmojtsenjáta, chënga enáyaye causa.

15 Cristo chënga mo cachca entšangcá tojábiamama, judiëngbe leyënga y mandënga ndocna obenana chamondëtsebonnama jamëse. Chca tojama, cha jóbänëse, chë útoica entšanga mo nÿe canÿe tsmëma entšangcá jábiamama, cháftaca cánÿiñe mo canÿacá jtsemnëse. Cha chca tojanma chënga nÿetscanga tšabá chamotsiyenama;

16 y Cristo cruciñe tojanóbanayeca, cha tojanma chë útoica entšanga enáyayana chamotsajbanama, y tojanma chë útoica entšanga mo canÿe entšangcá chamotsemnama, chënga tempcá tšabá Bëngbe Bëtsáftaca chamotsatsmënama.

17 Cristo quem luaroye tojánabo tšabe noticiënga jabábuayenama, tempcá tšabá Bëngbe Bëtsáftaca jtsatsmënama. Cha quem tšabe noticiënga tojanabuayená tšëngaftanga chë ndoñe judiëngbioye, chë Bëngbe Bëtsá ndoñe šmonjanábuatmënga, y chë judiëngbioynaca, chë Bëngbe Bëtsá imojanábuatmënga.

18 Er chábeyeca, canÿánÿenga y ínÿenga



montsobena chë Taitábioye jobéconana, er bënga nÿetscanga cachca espíritu bëngbe ainaniñe mondbomna, chë Uámana Espíritu.

<sup>19</sup> Chíyeca tšëngaftanga, Bëngbe Bëtsabe entsanguentše ndoñe quešmátsmëna mo inÿe luarocana ashjajnëngcá, y ni mo cachëngbe yebnentše ndoyenëngcá, tondayama derecho ndbomnënga. Inÿetšá endmëna; tšëngaftanga derecho šmondpomna cachcá ntšamo Bëngbe Bëtsabe entsanga mondbomncá, y Bëngbe Bëtsabe básenga šmondmëna.

<sup>20</sup> Jesucristo y chabe entsanga mondmëna mo canÿe jebna yebncá. Jesucristbe ichmónënga y chë Bëngbe Bëtsabe juabna oyebuambnayënga mondmëna mo chë ndëtsbënga ndayiñe chë yebna tojtsëcuatjoncá; tšëngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentše uashacuana ndëtsbecá.

<sup>21</sup> Quem más uámana luarentše uashacuana ndëtsbeñe, nÿetsca chë bëts yebnentša soyënga jtsëcuatjonana, y tsbanánoye más tmojatsjebëse, chë bëts yebnentše tsëm jebna sóynaca chiñe jtsëcuatjonana. Cachcá Cristo, mo chë más uámana luarentše uashacuana ndëtsbecá, jtsamana nÿetsca chábeñe ošbuáchiyënga cháftaca cánÿiñe mo canÿacá chamotsemnama, y inÿengnaca cachcá chamotsemnama. Y nÿetsca ošbuáchiyënga Crísoftaca cánÿiñe mo canÿacá tmojtsemna ora, chënga jtsemnana mo Bëngbe Utabnabiamana canÿe bëts yebna jebncá, chábioye jtsatschuanayama.

<sup>22</sup> Y tšëngaftanga Efesoca ošbuachiyëngbiámnaca Cristo entsama, chë inÿe chábeñe

ošbuáchiyëngaftaca mo canye entsangcá chašmotsemnama. Y chë Uámana Espíritu bëngbe ainaniñe yojtsiyénayeca, bënga nyetscanga cányiñe mondmëna, mo canye bëts yebncá ndayentše Bëngbe Bëtsá yoyena.

### 3

*Pablo Jesucristbe trabajo yojanbonyena, chë ndoñe judiëngbeñe jamama*

<sup>1</sup> Chca, atše Pablo utamená sëntsemna, Cristo Jesusbiamá soyënga entsanga abuyayinaye causa, tsëngaftanga chë ndoñe judiëngbe tsabiamá.

<sup>2</sup> Er tsëngaftanga ya cmontsamna jtsetatšëmbuama, Bëngbe Bëtsá tsëngaftangbe tsabiamá juabna yobomnama; y chca, chë trabajo atše šojabonyé, tsëngaftangbe tsabiamá jamama.

<sup>3</sup> Tsëngaftangnaca cmontsamna jtsetatšëmbuama ndayá Bëngbe Bëtsá šojinýinýé, ntšamo cha jamama tempo tojanjuabocá, pero entsanga chca ndoñe tonjaninýanýé, y chë soyama ya batšatema tcbonjubuábiamá.

<sup>4</sup> Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga,

<sup>5</sup> chë tempo Bëngbe Bëtsá ndocnábioye tbonjaninýinýé soyënga; pero mora cha tojinýanýé, Jesucristbe ichmónënga nye Bëngbe Bëtsabiamá oservénëngbioye y Bëngbe Bëtsabe juabna oyebuambnáyëngbioye; y cha chca tojama chabe Uámana Espíritoftaca.

<sup>6</sup> Ndayá tempo Bëngbe Bëtsá ndoñe tonjaninýanýecá mëntsá endmëna: chë ndoñe

judiënga Jesucristbe tšabe noticiënguifne chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábiocana mochjoshachiñcá, chëngnaca chábiocana mo otocancá chë soye mochanjójyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nÿetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjójyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cánÿifne mo canÿacá bëtsemnayeca.

<sup>7</sup> Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservénama, tšabe noticiënga entšanga jtsabuayiynayëse; y cha átšeftaca chca tojanma chabe obenánaca.

<sup>8</sup> Atše nÿetsca chë Bëngbe Bëtsabe entšanguentše sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëtscá tšabe soyënga chë ndoñe judiënga jábuayenama. Chë Cristbe soyënga tša bëtscá endmëna, y chca, quenátopodena chë soyënguentšana lempe jtsabuatmana.

<sup>9</sup> Y chë trabajo šonjabonÿé jamama, nÿetscanga botamana jinÿama chamotsobenama ndayá Bëngbe Bëtsá yochjama, ndayá cachá, chë nÿetsca soyënga tojamá, tempscana yojanjuabnacá. Mëntscoñama Bëngbe Bëtsá chë soye ndocnábioye tbonjinÿinÿé, pero mora aíñe.

10 Chca, Crístbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá.

11 Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucrístoftaca, Bëngbe Utabná.

12 Bënga Crísoftaca cánýiñe mo canýacá mondmëna, y chábeñe mondošbuachéyeca, bënga montsobena Bëngbe Bëtsábioye jobéconama tondayama ntjatauatjca, y corente jtsetatšëmbëse cha ndoñe chašondubatema.

13 Chíyeca atše cbontsaimpadana ndoñe chašmondëtsajbaná ainaniñe añemo bomnana, atše séntsesufrina causa, er chë tšëngaftangbe tšabiamá tsësufrintšana, tšëngaftangbiamá tšabe soyënga endóbocana.

### *Cristbe bonshánana*

14-15 Y chca, Bëngbe Bëtsá, chë Taitá, ndábentšana nyetsca pamíllanga celoca y quem luarentše uabaina imóyëngacañe, chabe delante joshaméntšase,

16 séntseimpadana, chabe bëtscá uámana bomnánaca chaoma, tšëngaftanga ainaniñe obenana y bëtš añemo chašmotsebonnama, chabe Espíritbeyeca,

17 y tšëngaftanga Crístbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca séntseimpadana, cha y ínýenga nyets ainánaca jtsababuánýëshanëse,

18 tšëngaftanga y nyetsca Bëngbe Bëtsabe entšángnaca tšëngaftangaftaca, chašmotsobena

josértama Cristbe bonshánana bēngbiana tša bētská yomnama. Nderado nda tojontsé chabe bonshánana jatšēmbonana mo canye soye cuaftsemncá, cha ndocna te nanjobenaye jtsetatšēmbuana tēntšoye ndayēntscoca yomna y nyanējoye ndayēntscoca, jashenoye ndayēntscōñe y tsbanánoye ndayēntscōñe yomna.

<sup>19</sup> Atše sēntseimpadana tšēngaftanga chašmobená chē bonshánana juabuátmanana (chē bonshánana puerte bētská endmēna causa, bēnga ndocna te quemochatobenaye josértama ntšamo chē soye lempe yomnana). Pero sēntseboše, tšēngaftangbe ainaniñe nye Bēngbe Bētsabe soyēnga chaotsemna y tšēngaftanga chašmotsiyena jtsamēse, ntšamo tšēngaftanga chašmotsamama Bēngbe Bētsá yujuabnacá.

<sup>20</sup> Y mora, n̄yetscanga Bēngbe Bētsá chamotsatschuaná. Cha obenana yobomna ntšamo bēnga tmojtsojtjanañe o tmojtsejuabnama más soyēnga jamama, chabe puerte bēts obenánaca; y chē obenana bēngbe ainaniñe yojtsemánda y yojtsama bēnga ainaniñe sempre ošbuáchiyana chamotse-bomnama.

<sup>21</sup> ¡Entšanga Bēngbe Bētsá chamotsatschuaná n̄yets tempo y n̄yetsca tescama, ndayá Crístbeñe ošbuáchiyēnga tmojtsamama y cach Cristo tojamámnaca! Chca chaotsemna.

## 4

*Uámana Espíritbeyeca bēnga cán̄yiñe mo can̄yacá jtsemnana*

1 As, atše chë cárceloye utamená, Bëngbe Utabnabiana trabájaye causa, tšëngaftanga cbontsaimpadana, ndëmuanÿenga Bëngbe Bëtsá tcmojáchembo chabe entšanga chašmotsemnama, sempre chašmotsiyena mo chë entšangcá ndëmuanÿenga Bëngbe Bëtsá cach soyama tojánachembo y chca imomerecena.

2 Cada ona chamotsenojuabná mo chë ínÿenga chabiana más uámanënga tmojtsemncá, y nÿetscángbioye puerte bonshanánaca šmochtsobátmana, y bëtscá bonshánana jtsebomnëse šmochtsenëuantana;

3 sempre šmochtsejuabnaye y šmochtsentšena tšëngaftanga nÿets tempo cánÿiñe mo canÿacá chašmotsemnama, nÿetsca tšëngaftanga natjëmbana jtsemnëse. Y tšëngaftanga šmontsobena cánÿiñe mo canÿacá jtsemnana chë Uámana Espíritbeyeca.

4 Bënga Jesucrístbeñe ošbuáchiyënga bëtsemnayeca mondmëna mo cach cuerpentšëngcá, chë Cristbe cuerpo, y cachca Espíritu bënga nÿetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nÿetscanga cachcá šochjátšatayama chamot-sobátmanama.

5 Bënga nÿetscanga cach Utabná mondbomna, cachca ošbuáchiyana Jesucrístbeñe mondbomna, y bënga nÿetscanga uabáinënga mondmëna chca bet-sošbuáchiyama.

6 Bënga ošbuáchiyënga nÿetscangbiana cach Bëngbe Bëtsá y Taitá endmëna. Cha bëngbe amëndayá endmëna, chabe obenana nÿetscángbeñe jtsinÿnana, y nÿetsca bëngbe ainaniñe chabe

Espíritu endmëna.

7 Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama.

8 Chiyeca, Bëngbe Bëtsabe uabemana palabrenguiñe Jesucristbiana mëntšá endayana: Cha celoye tontantsjuá, y cháftaca tonjanéyamba nyetsca chabe uayayënga, chë tojánayënjananga,

y chabe entšángbioye obenana tonjanatsatá, tšabe soyënga jamama ca.

9 ¿Y ndayá yojsayana chë “cha tontantsjuá ca”? Chca entsayana co Cristo natsana, quem luaroye tojánastjango ca.

10 Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canye ora nyëtscañe cha chaotsemnama.

11 Y cachá, chë tšabe soyënga jamama obenana tojanatsatá ora, tojanma chábeñe ošbuáchiyënguentše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiana abuyiynayënga, y ínÿengna ošbuáchiyënga anÿenënga y Bëngbe Bëtsabe soyëngama abuatambayënga.

12 Cristo tojanabacacangna chabe entšángbioye mochjanëjabuache, cha tojanabanyé trabajo chënga chamotsamama, y nyetsca ošbuáchiyënga, chë nyetscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama,

13 bēnga n̄yetscanga chamobenantscuana cachca ošbuáchiyana Jesucristbeñe jtsebomnama, y Bēngbe Bētsabe Uaquiñabiama n̄yetscanga lempe cachcá jtsetatsēmbuama. Chca, bēnga mochanjashjache jtsemnama lempe ntšamo Cristo yomncá, mo bētsētsanga bētscá juabna bomnēngcá,

14 y ndoñe n̄ye mo basengcá, Bēngbe Bētsabe soyēngama jtsetatsēmbuama. Chē soyēnguiñe ya ndoñe más n̄ye mo basengcá quemochátsmēna, ndēmuan̄yēnga paselo jáingñama yomna. Mo can̄ye barquēsha n̄ye ndaye bín̄yiacnaca tojtsēyambancá, básefta entšanga n̄ye ndaye buatēmbana soye tmojatuenká jatsyeunanana; bēnga ndoñe chca quemochátsmēna, ya ndoñe más bēngbe juabna quemochatstróca, n̄ye ndaye tmojatuená tsēm sóyeca, ín̄yēngbioye áingñayēnga. Chēnga becá montsetátsēmo ntšamo entšanga jáingñana, y montseboše chē montsabuatambá bostero soyēnga bēnga jtseyeunanama.

15 Chamna, chē Bēngbe Bētsabe ndegombre soyēngama bonshanánaca jtsóyebuambnayēse, šontsamna jashjáchana jtsemnama lempe ntšamo Cristo yomncá. Cha bēngbe amēndayá endmēna, cachcá ntšamo bestšaše chē cuerpentša soyēnga jtsemandayancá.

16 Mo can̄ye bestšašcá, chēse jamana n̄yetsca chē cuerpentša soyēnga ndayentše chamueneffnama y chiñe jobónjuama chamotsobenama, chē cuerpo saná chaotsebomnama jtsamēse, chca, n̄yets cuerpo tšabá chaóbochema, cachcá Cristo, chē n̄yetsca ošbuáchiyēngbe amēndayá, chabe obenánaca jamana chēnga cada te más



ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nyets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nyetsca ošbuáchiyënga cada te más ošbuáchiyana mochántsebomna, puerte jtsenbobonshánëse.

*Crístoftaca cányiñe mo canyacá jtsemnëse tsëm vida šmochtsebomna*

<sup>17</sup> Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebomnama tšëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá.

<sup>18</sup> Chëngbe juabnoca obenana mondbomna nyë ndoñe ndegombre soyëngama josértama. Chënga ndoñe quemátsbomna chë Bëngbe Bëtsábíocana yóbocana tšabe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama.

<sup>19</sup> Chënga bacna soyënga tmojtsama ora, tondayama ntsenócochinÿenana; chënga nyets tempo jesentšénana nyetsca bacna soyënga amana, y chca jtsamana tondayama ntjatenojuabnaycá.

20 Pero chca ndoñe quenjatsmëna ntšamo tšëngaftanga Cristbe soyëngama šmojanatsjinÿe y ntšamo chábioye šmojanabuatmancá.

21 Ndegombre tšëngaftanga chabiamá šmojanuena y ínÿenga tcmojanabuatambá mo chábeñe ošbuachiyëngcá y ntšamo chë ndegombre soyënga Jesucristbeñe endbinÿncá.

22 Chcasna, ntšamo tšëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquéda; ntšamo tempo tšëngaftanga šmojanjuabná, šmojansentina y šmojanamcá, canÿe ondbiamnaye juabnentsana yojóbocana, tšëngaftanga bacna soyëngama juabnëngaca mandánënga jtsemnëse, y chë juabnënga tšëngaftangbioye cmojánaingñaye.

23 Tšëngaftanga cmontsamna tšëngaftangbe juabniñe tsëm y tšabe juabnënga jtsebomnana.

24 Tšëngaftanga cmontsamna jashjáchana mo tsmëma entsangcá jtsemnama, y chë ntšamo tempo šmojanamcá mora ndoñe cachcá chašmondëtsamama. Chca, tšëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entsangcá tcmojábiamá, tšëngaftanga chašmotsiyenama jtsemnëse Bëngbe Bëtsabe bominyiñe tšabá yomna soyënga y chábioye jadórama soyënga, chë ndegombre soyënguentšana óbocana soyënga.

25 Chcasna, ya ndoñe más šmattsebostero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er

nÿetscanga cányiñe mondmëna mo nÿe canÿe entšangcá.

<sup>26</sup> Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nÿets te chacmondetëna.

<sup>27</sup> Ndoñe šmatjaleséncia Satanás ndayánaca tšëngaftangaftaca chaomama.

<sup>28</sup> Chë yojanatbëbaná chauajbaná atbëbanama y jatrabájama chaontsé; cachabe cucuátšeca tšabe trabajo chaotsóboma, chca, ndayánaca cha chaotse-bomnama chë ujabótënga jatšatayama.

<sup>29</sup> Bacna palabrënga ndoñe šmattsichamo, pero aíñe tšabe palabrënga y nÿa chorsca ujabótama palabrënga, chë inÿe entšángbioye jujabuáchama más Cristcá chamotsemnama, chënga Bëngbe Bëtsábiocana tšabe bendicionënga chamóyëngacñama, chë ndayá chašmojtsëtsëtsná sóyeca.

<sup>30</sup> Ndoñe šmattsama soyënga, Bëngbe Bëtsabe Uámana Espíritu chabongmema. Bëngbe Bëtsá tojama Uámana Espíritu tšëngaftangbe ainaniñe cháuamashënguama, y chca, tcmojanainÿnaná chabe entšanga bëtsemnayeca, chë yochjóshjango tescama, Bëngbe Bëtsá chabe entšanga nÿetsca tescama yochjatsebacaye orscama.

<sup>31</sup> Inÿengbiamama bacna juabnënga ainaniñe ndoñe chašmondëtsebomna, etonánënga ndoñe chašmondëtsemna, ni inÿengaftaca ndoñe chacmondetëna. Inÿengbioye ndoñe chašmondëtsabuachembuana, inÿengbioye ndoñe šmatjoyánguango y ndaye bacna sóynaca ndoñe šmattsama.

32 Njetscángaftaca tšábenga šmochtsemna, njetscanga šmochtsenlastemana y šmochjenperdóna, ntšamo Běngbe Bětsá, Crístbeyeca tcmojaperdonacá.

## 5

*Ntšamo yomna Běngbe Bětsabe básenga chamot-siyenama*

<sup>1</sup> Tšěngaftanga, Běngbe Bětsabe bonshana básenga quetsomñecá, nya šmochtsentšena cachacá jtsemnama.

<sup>2</sup> Smochtsiyena njetsca soyěnga bonshanánaca jtsaměse, ntšamo Cristo šojanababuanjeshancá; chca, cha chabe derecho vida jtsobomñama cachcá tojanonjá y běngbiana tojanóbana. Y ntšamo Cristo tojanmca, yojamna Běngbe Bětsábioye jětschuayama, y chabe bominjěne tša tšabá yojtsemna, mo ndaye ora Běngbe Bětsá oyejuayá jójěngacñana ndayá tcojóba y altaroca tcojajuinjese, y chě soye botamana jtsonguětsiyana.

<sup>3</sup> Tšěngaftanga, Běngbe Bětsábenga šmogněnga, ndoñe quecmátamna shembása o boyabásaftaca bacna soyěnga jtsamana, ni chca játamama jtsejuabnayana y jtsebošana, y chě nje yapa jěsebošana más soyěnga ínjěngbiana jtsebomnama cach ndoñe. Ni chě soyěngama ndoñe šmattsóyebuambnaye.

<sup>4</sup> Bacna soye ndoñe šmattsóyebuambnaye, ni corente ntjenojuaboycá, ni nje ntšámnaca bacna soye jenbotatšěmbonana cach ndoñe, er chě soyěnga tšěngaftangbiana ndoñe tšabá

ntsemnana. Chca játamamna, más tšabá, Běngbe Bětsá šmochtsatschuanaye.

<sup>5</sup> Er tšěngaftanga ya šmondětatsěmbo, ndocna chě shembása o boyabásaftaca bacna soye amá, ndocna chě nje chabe bacna juabněngaca soyěnga jtsamama oyená, o chě nje más soyěnga ín्यengbiamama jtsebmomnama bošá y amá (chca jtsayanana chabiamama más iuámama soyěnga jtsebmomnana, Běngbe Bětsábioye jatsbobonshánama), chca aměnguentšana ndocná tondaye queochatóyěngacne ndayá Běngbe Bětsá chabe entšangbioye jatsatayama tojašebuachenantsana, Cristo y Běngbe Bětsabe aměndayoca.

<sup>6</sup> Ndocná chacmondaingñé ndoñe ndegombre tondměna palabrěngaca, bacna soyěnga chašmotsamama, er chě causa chě uabouana castigo echanjobaye, ndáyeca Běngbe Bětsá chábioye nděyeunaněnga yochjácastigaye.

<sup>7</sup> Chíyeca, chca aměngbe soyěnga tondaye šmattsama.

<sup>8</sup> Tempo tšěngaftanga šmojanienama bacna juabněnga jtsebmomněse y bacna soyěnga jtsaměse, mo ibetiñe cuaftsiyencá, pero mora Běngbe Utabnáftaca cányiñe mo canyáca bětsemnayeca, chabe soyěnga šmontsetátšěmbo y sempre šmondětsemna cháftaca, chě entšangbe juabněnga binynayáftaca. Smochtsiyenama jtsaměse mo chě binynayabe entšangcá.

<sup>9</sup> Chě binynayábeyeca entšanga tšabe soyěnga jtsamana, chě Běngbe Bětsabe bominyiñe tšabá yomna soyěnga, y ndegombre soyěngnaca.

<sup>10</sup> Nya šmochtsentšena soyěnga jamama, Běngbe

Bëtsá oyejuayá chaotsemnama.

11 Chë mo ibetiñe cuaftsiyencá oyenëngbe bacna soyënga tondayama ntsoservénana, y tšëngaftanga chca ndoñe šmattsama. Chamna, chëngbioye šmochjínyanÿiye chënga ndoñe tšabá tmonjamama.

12 Ndegombre, nÿe chë ndayá chënga mo iytëmencá tmojamama jóyebuambayama ya cuantsëuatja;

13 pero nÿetsca soyënga binÿniñe tmojacjá ora jtsopodénana tšabá jinÿyama ntšamo ndegombre tomncá. Cachcá, ntšamo entšanga tmojamcá chë binÿnayá chaojinÿanyé ora, echantsopodena jtsotatšëmbuama ntšamo chë soyënga yomnana;

14 er ndayánaca binÿniñe tojtsinÿinÿena, jtsopodénana jinÿyama ntšamo ndegombre chë soye tomncá. Cachcá, ntšamo entšanga iytëmencá tmojtsamcá chë binÿnayá chaojinÿanyé ora, chënga mochántsetatšëmbo bacna soyënga imojtsamama. Chíyeca mëntsá jtsichámuana:

Botamana cochjájuaboye, aca ndoñe quecátobena jenomándana, mo canÿa cuaftsomañcá;

chë bacna soyënga ama causa, Bëngbe Bëtsabe bom-inÿiñe mo obanëngcá imomnënguentšana šmochtsojuánañe,

y Cristo acbe juabnënga echantsebínÿnaye ca.

15 Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aiñe chë chca soyëngama osertanëngcá.

16 Lempe ntšamo chašmojobenacá nÿets tempo tšabe soyënga šmochtsama, er quem tempo entšanga yapa bacna soyënga montsama.

17 Ntjenojuaboycá ndoñe šmattsama, mo chë ndosertanëngcá. Pero aíñe bëtscá šmochtsentšena ndayá Bëngbe Utabná jamama yobošcá chacmósertama.

18 Ndoñe šmattsótmenaye, er chë soye entšábioye juanatsana jenomándama ndoñe chaondëtsobenama; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama.

19 Šmochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nÿets ainánaca Bëngbe Utabnabiana šmochjacántaye y cha šmochtsatschuanaye.

20 Nÿets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

*Ntšamo yomna canÿe yebnentšënga chamotsem-nama*

21 Nÿetscanga šmochtsenëyeunana, tšëngaftanga Crístbioye puerte šmorrespetánayeca.

22 Shémanga, šmochtsetátšëmbo tšëngaftangbe boyanga chë yebnentša mándayënga imomnama; y nÿets tempo chca šmochtsama, Bëngbe Utabná chašmotsobedecénama.

23 Er boyá endmëna shembe mandayá y inÿená, ntšamo Cristo chë ošbuáchiyëngbe mandayá y inÿená endmëncá. Cha chënga tojatsebacá y mora

cha chënga entsamënda, mo chë bestšaše nyets cuerpo jtsemandayancá;

<sup>24</sup> y chca, ntšamo chë ošbuáchiyënga, Cristo chëngbe amëndayá yomnama imotatsšëmbcá y chca jtsamana, cachcá, chë shemángnaca entsamna jtsemnana nyetsca soyënguiñe chëngbe boyángaftaca.

<sup>25</sup> Boyanga, tšëngaftangbe shémanga šmochtsababuánÿeshana, ntšamo Cristo chábeñe ošbuáchiyënga yojanababuanÿeshancá, y chca, chabe derecho vida jtsobomñama cachcá tojanonÿá y chëngbiamama tojanóbana.

<sup>26</sup> Chca tojanma, chënga chabe entsanga y puerta tšábenga jábiamama; y chënga tmojánenabayey ora, tmojaninÿanÿé Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiamama buayenana soyënga tmojanuena ora.

<sup>27</sup> Cha chca lempe tojanma, chë ošbuáchiyënga japróntayama corente tšábenga y uámanënga cachabiamama chamotsemnana, ndocna bacna soye ndobomnënga, ni ndocna entsá chaondobená jayanama chënga imomna chë ndoñe tšabá tmonjamënga ca, ni ndocna inÿe cachca sóyeca.

<sup>28</sup> Ntšamo canÿe boyá cachabe cuerpo endbetsebobonshancá, cachcá cha bontsemna chabe shémbioyey jtsebobonshánana. Nda chabe shémbioyey tbojtsebobonshana, cachábioyey jtsenobobonshánana, er chata cánÿiñe jtsemnana mo nÿe canÿe entsá cuenta.

<sup>29</sup> Er ndocná cachabe cuerpo jtsáboyënjana, ndayá saná janguangoñana y jtsinÿenana, ntšamo Cristo bënga chë ošbuáchiyëngaftaca endbetsamcá;



<sup>30</sup> er bēnga n̄yetscanga cānyīñe mondmēna mo chabe cuerpo cuaftsemncá, y bēnga mo chabe cuerpentša soyēnga cuaftsemncá.

<sup>31</sup> Ntšamo Bēngbe Bētsabe uabemana palabrēnguiñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y chē útata mo canyáca bochántsemna ca.”

<sup>32</sup> Chē soyēnga josértama puerta totcá comna, pero atše šcuayana, chē soye entsoyebuambná ntšamo Cristo chábeñe ošbuáchiyēngaftaca yomnama.

<sup>33</sup> Pero morna, tšēngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stētšoye chabondēquedá.

## 6

<sup>1</sup> Básenga, Bēngbe Utabnáftaca cānyīñe mo canyáca bétsemnayeca, tšēngaftangbe bētsétsangbioye šmochtsayaunana, er chca jamana tšabá endmēna.

<sup>2</sup> Moisesbe leyiñe canye mando endmēna, y chentše endmēna chē Bēngbe Bētsabe natsana mando, ndayentše cha tojašbuachená tšabe bendicionēnga jamama: “Acbe taitá y acbe mamá ndoñe stētšoye catjēftsaquédaye,

<sup>3</sup> tšabe vida chacuetsobomñama y quem luar-entše bayté chacuetsiyenama.”

<sup>4</sup> Taitanga, ndoñe šmattsama tšēngaftangbe básenga chauetēnama; más tšabana, chēnga šmochtsabēchaye jtsabuátambayēse y jucácanēse, ntšamo Bēngbe Utabná endbetsabuatambaycá.

5 Tšëngaftanga, chë nyets tempo nye ínÿabiana oservénënga, tšëngaftangbe nduiñënga šmochtsayaunana; chca šmochtsama puerte respétoca, bëtská cuedádoca y nyets ainaniñe tšabe juabnëngaca, mo cach Crístbioye cuaftseservencá.

6 Y chca chë nduiñëngbioye šmochtsaservena, ndoñe nye chënga chacmojtsénÿa ora, mo nda nye entsangbe delante tšabá joquédama cuaftsebošcá, ndayá Cristbe oservenëngcá, chënga nyets ainánaca jtsamana ntšamo Bëngbe Bëtsá tojtsebošcá.

7 Nyetsca trabajotémënga šmochtsama nyets tšëngaftangbe añémoca, mo Bëngbe Utabnabiana cuaftsetrabajacá, y ndoñe nye entsangbiana.

8 Er tšëngaftanga ya šmondétatsëmbo, cada ona, nyets tempo nye ínÿabiana trabajayá o nye cachabiana trabajayá tomna, ntšamo tšabe soyënga tojamcá Bëngbe Utabnábiocana yochjóyëngacñe.

9 Y tšëngaftanga, ndëmuanÿëngbiana ínÿënga nyets tempo imoservena, cachcá tšabá chëngaftaca šmochjamna, tondayama ntsaútatjnayëse. Šmochtsenójuabnaye, Bëngbe Utabná chë celoca endméná, tšëngaftanga y chëngbe mandayá yomnama, y chabiana nyetscanga cachcá monduámána.

*Ndayá Bëngbe Bëtsá entsanga tojatsatá Satanasbiana jenëuyanama*

10 Y morna, Bëngbe Utabnáftaca cánÿiñe mo canÿacá jtsemnëse, ainaniñe bëts añemo šmochtsebomna, chë Bëngbe Utabnabe bëts obenanentsana óbocana añemo.

11 Mo canÿe soldadcá, ba soyënga jtochëtjuana chë tmojtsentsjananga ora uayayëngbiana

jeněuyanama, tsěngaftágnaca cachcá, nyetsca chě Běngbe Bětsá cmojatsatá soyəngaca šmochtseprontana jeněuyanama, tsěngaftanga jáingñama Satanás ntšámnaca tojtsama ora, ndoñe chacmondáyēnjanama.

<sup>12</sup> Er bēnga ndoñe quemuatenojuerzana cach quem luarentša entsángaftaca jeněyēnjanama, ndayá bacna espíritēnga mando bomnēngaftaca; bacna espíritēnga obenana bomnēngaftaca; y quem luarentša entsanga, chě bacna juabna bomna causa y Běngbe Bětsabe soyēnga nduabuatma causa, mo ibetiñe cuaftsoyencá oyena entsángbioye amēndaye espíritēngaftaca; y chě tsbanánoca luarēnguiñe imomna y bacna soyēnga chaotsebínynama ama espíritēngaftácnaca.

<sup>13</sup> Chíyeca, lempe ntšamo Běngbe Bětsá cmojatsatacá šmochjójəngacñe y chě soyēnga jtsamēse šmochtsiyena jtseprontánama, mo canye soldado jeněuyanama y jáyēnjanama bētscá soyēnga tojtochětjá. Chca šmochjama, chě uayayá Satanás tsěngaftangbioye jáingñama chaojtsama ora ndoñe chacmondáyēnjanama, y jeněuyanama lempe jtsamēse, chašmobená cha jayēnjanama.

<sup>14</sup> Mo canye soldadcá, jabuache jtasnayana y cochaca canye morocho soye jenáčochjatsana jtsevalentiamá y ndoñe chamonděyēnjanama, tsěngaftágnaca cachcá, ntšamo ndegombre yomncá jtsamēse šmochtsiyena, mo chě jabuache cuaftasnacá, y chě Běngbe Bětsabe bominyñe tsabá yomna soyēnga jtsamēse, mo chě morocho soye cochaca cuaftenacochjatscá, chca, Satanás tsěngaftangaftaca tondaye chaondobená jamama.

15 Mo canye soldadca jtoshecochëtjuana betsko jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayiynayama ntšamo Bëngbe Bëtsá inétsama entšanga tempcá tšabá cháftaca chamotsatsmënama.

16 Canye soldado escudo jtsebomnana chë uayayabe uajuinÿinÿana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerta jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora.

17 Mo chë soldadca, canye morocho buchtsanëse tojtabuchëtsëse chabe bestšaše jenëuyanama, tšëngaftángnaca cachcá, siempre šmochjésejuabnaye Bëngbe Bëtsá cmojätsebacama, y chë juabna cmochanjújabuache, mo canye morocho buchtsanëse cuaftsabuchëtsancá. Mo canye soldadca, chë uayayábioye jayënjanana, chabe espadéjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayënjanama. Uámana Espiritu jtsamana, tšëngaftanga Bëngbe Bëtsabe palabra chašmotsebomnana.

18 Nÿets tempo chë Uámana Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca

chašmojtsencuénta ora, y chca šmochjama Běngbe Bětsábeñe sempre jtsobátmaněse, y Jesucristbeñe ošbuáchiyěngbiana n̄yetscangbiana cha šmochtseimpadana.

19 Atšbiámnaca Běngbe Bětsá šmochtseimpadana, atše jóyebuambayama chajjontsé ora, cha chě buayenana soye chašúyanama; y atše chayobená tondayama ntjatauatjca jóyebuambayana, y chca, entšanga chayin̄yan̄yé Jesucristbiana tšabe noticiēga, ndayá chēga tempo ndoñe monjántatšēmo.

20 Běngbe Bětsá šojichmó mo can̄ya chabe cuenta oyebuambnayacá, chě buayenánama entšángbeñe jóyebuambayama, y chca bétsamama, mora atše utamená sěntsemna. Atšbiana Běngbe Bětsá šmochtseimpadana, atše chayobenama Cristbe buayenánama tondayama ntjatauatjca jóyebuambayana, ntšamo atše jamama šojtsemncá.

### *Pablo chēga jtadióšoftanama*

21 Tíquico, Jesucristbeyeca bēngbe bonshana catšata y can̄ye entšá tšabe palabra bomná, Běngbe Utabnabe trabajo jamama oservéniñe, ntšamo atše stsemnama y ndayá stsamama tšēngaftanga chašmotsetatšēmbuama, lempe cmochanjácuntaye.

22 Chama cha tšēngaftangbioye sēnjichmó, ntšamo muentše fstsemnama chacmēyanama, y tšēngaftanga ainaniñe añemo chašmotsebomnama chaomama.

23 Atše sěntseimpadana Běngbe Bětsá chě Taitá y Běngbe Utabná Jesucristo, chaboma chě Jesucristbeyeca catšátangbe ainaniñe tšabe ebionana chašmotsebomnama, y

Bëngbe Bëtsábioye y ínÿengbioye puerte  
chašmotsababuánÿeshanama, Jesucrístbeñe  
tšëngaftangbe ošbuachiyánaca;

<sup>24</sup> y chaboma, chë Bëngbe Utabná Jesucrístbioye  
bëts bonshanánaca imobobonshanëngbeñe tšabe  
bendicionënga chaotsemnana, canÿe ndocná  
yondobena jatrócama bonshanánaca.

## **Bëngbe Bëtsa Cabëngaftaca Entsoyebuambna New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files  
dated 29 Jan 2022  
19104c0e-9046-5ff3-82fb-eb838c88dcf9